

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՍԱՀՄԱՆԱԴՐԱԿԱՆ ԴԱՏԱՐԱՆԻՆ

ԴԻՄՈՂ՝ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՄԱՐԴՈՒ ԻՐԱՎՈՒՆՔՆԵՐԻ ՊԱՇՏՊԱՆ  
ԱՐՄԱՆ ԹԱԹՈՅԱՆ

**Դ Ի Մ ՈՒ Մ**

«Կրթության մասին» ՀՀ օրենքի 6-րդ հոդվածի 4-րդ մասի՝ ՀՀ Սահմանադրության համապատասխանության հարցը որոշելու վերաբերյալ

**1. Դիմումը ներկայացնելու իրավական հիմքը.**

Դիմումը ներկայացվում է հիմք ընդունելով 2005 թվականի փոփոխություններով ՀՀ Սահմանադրության 101-րդ հոդվածի 1-ին մասի 8-րդ կետը:

**2. Դիմումի առարկան.**

Սույն դիմումով վիճարկվում է 1999 թվականի ապրիլի 14-ին ՀՀ Ազգային ժողովի կողմից ընդունված, 1999 թվականի մայիսի 8-ին ՀՀ Նախագահի կողմից ստորագրված և 1999 թվականի մայիսի 14-ին ուժի մեջ մտած «Կրթության մասին» ՀՀ օրենքի 6-րդ հոդվածի 4-րդ մասի՝ ՀՀ Սահմանադրության 38-րդ հոդվածին համապատասխանությունն, այնքանով, որքանով այն չի ապահովում պետական ուսումնական հաստատություններում 4-րդ դասարանից բարձր դասարաններում ուսուցանող աշակերտների՝ միջնակարգ անվճար կրթություն ստանալու իրավունքի լիարժեք իրացումը:

### **3. Դիմումով վիճարկվող իրավական դրույթները.**

«Կրթության մասին» ՀՀ օրենքի<sup>1</sup> 6-րդ հոդվածի 4-րդ մասի համաձայն՝

#### **«Հոդված 6. Կրթական իրավունքի պետական երաշխիքները**

(...)

4. Պետական հանրակրթական դպրոցների առաջինից չորրորդ դասարանների աշակերտներին պետությունը պետական բյուջեի միջոցների հաշվին անվճար ապահովում է տարրական ընդհանուր կրթական ծրագրերով նախատեսված դասագրքերով: (...):»:

### **4. ՀՀ Սահմանադրության համապատասխան հոդվածները.**

#### **«Հոդված 38. Կրթության իրավունքը**

1. Յուրաքանչյուր ոք ունի կրթության իրավունք: (...) Պետական ուսումնական հաստատություններում միջնակարգ կրթությունն անվճար է:»:

#### **«Հոդված 75. Հիմնական իրավունքների և ազատությունների իրականացման կազմակերպական կառուցակարգերը և ընթացակարգերը**

Հիմնական իրավունքները և ազատությունները կարգավորելիս օրենքները սահմանում են այդ իրավունքների և ազատությունների արդյունավետ իրականացման համար անհրաժեշտ կազմակերպական կառուցակարգեր և ընթացակարգեր:»:

### **5. Գործնականում առաջացած խնդիրները.**

Մարդու իրավունքների պաշտպանի աշխատակազմ ներկայացված դիմումներով բարձրաձայնվել է հանրակրթական ուսումնական հաստատություններում դասագրքերի օգտագործման դիմաց ներդրումային գումարների գանձման խնդիրը:

Այսպես, Օրենքի 6-րդ հոդվածի 4-րդ մասի համաձայն՝ պետական հանրակրթական դպրոցների *առաջինից չորրորդ դասարանների աշակերտներին*

---

<sup>1</sup> Այսուհետ՝ Օրենք

պետությունը պետական բյուջեի միջոցների հաշվին անվճար ապահովում է տարրական ընդհանուր կրթական ծրագրերով նախատեսված դասագրքերով:

ՀՀ կրթության և գիտության նախարարի՝ 2009 թվականի օգոստոսի 21-ի «Հանրակրթական ուսումնական հաստատությունները դասագրքերով ապահովելու, հանրակրթական առարկաների դասագրքերը հրատարակելու և հանրակրթության պետական չափորոշչին դասագրքերի համապատասխանության գնահատման առարկայական հանձնաժողովների ձևավորման կարգը հաստատելու մասին» № 752-Ն հրամանի<sup>2</sup> ՀՀ հանրակրթական ուսումնական հաստատությունները դասագրքերով ապահովելու և հանրակրթական առարկաների դասագրքերը հրատարակելու կարգը սահմանող հավելվածի 5-րդ կետի համաձայն՝ յուրաքանչյուր ուսումնական տարվա սկզբից առնվազն 15 օր առաջ Հայաստանի Հանրապետության կրթության և գիտության նախարարի կողմից հաստատվում են՝

- 1) տվյալ ուսումնական տարում օգտագործվող հիմնական դասագրքերի ցանկը.
- 2) սովորողների ծնողների (օրինական ներկայացուցիչների) կողմից դասագրքերի օգտագործման դիմաց ներդրումային գումարների տարեկան չափը:

Արդյունքում՝ 2017 թվականի հուլիսի 28-ին ընդունվել է «Հանրակրթական ծրագրեր իրականացնող հաստատությունների 2017-2018 ուսումնական տարվա դասագրքերի համար ներդրումային գումարների չափը հաստատելու մասին» ՀՀ կրթության և գիտության նախարարի № 834-Ա/2 հրամանը:

ՀՀ կրթության և գիտության նախարարի թիվ 834-Ա/2 հրամանի հավելվածի ուսումնասիրությունից պարզ է դառնում, որ 1-ից 4-րդ դասարանների բոլոր դասագրքերն անվճար են, իսկ 4-րդ դասարանից բարձր դասարանների կրթական ծրագրերով անհրաժեշտ դասագրքերի համար միջինում սահմանվում է 380-ից 550 ՀՀ դրամ ներդրումային գումար: Ստացվում է, որ յուրաքանչյուր ծնող, օրինակ՝ 5-րդ

---

<sup>2</sup> Այսուհետ՝ Հրաման

դասարանի մաթեմատիկա առարկայի դասագրքի օգտագործման համար պետք է վճարի 490 ՀՀ դրամ:

Վերոնշյալ իրավական ակտերի բովանդակային-համադրված վերլուծությունից բխում է, որ պետական հանրակրթական դպրոցների առաջինից չորրորդ դասարանների աշակերտներին պետությունը պետական բյուջեի միջոցների հաշվին անվճար ապահովում է տարրական ընդհանուր կրթական ծրագրերով նախատեսված դասագրքերով, իսկ այլ դասարանների աշակերտների դասագրքերի համար սովորողների ծնողների (օրինական ներկայացուցիչների) կողմից դասագրքերի օգտագործման դիմաց վճարվում են ներդրումային գումարներ: Ընդ որում, վերոնշյալ իրավական ակտերի վերլուծությունից կարելի է եզրակացնել, որ այդ ներդրումային գումարների վճարումը դասագրքերի տրամադրման համար պարտադիր պայման է:

Դիմում ներկայացրած անձինք հայտնել են, որ նշված ներդրումային գումարների նախատեսման և գանձման արդյունքում սահմանափակվում է որպես անձի հիմնական իրավունք ՀՀ Սահմանադրության 38-րդ հոդվածով ամրագրված պետական ուսումնական հաստատություններում անվճար միջնակարգ կրթություն ստանալու իրավունքը:

Օրենքի 18-րդ հոդվածի 3-րդ մասի համաձայն՝ միջնակարգ կրթությունն իրականացվում է եռաստիճան միջնակարգ հանրակրթական դպրոցում՝ 12 տարի ընդհանուր տևողությամբ՝ տարրական դպրոց (1-4-րդ դասարաններ), միջին դպրոց (5-9-րդ դասարաններ), ավագ դպրոց (10-12-րդ դասարաններ) հաջորդական աստիճաններով: Նշված հոդվածի 7-րդ մասի համաձայն՝ *միջնակարգ կրթությունը պետական ուսումնական հաստատություններում անվճար է:* Ըստ «Հանրակրթության մասին» ՀՀ օրենքի 4-րդ հոդվածի 5-րդ մասի՝ *միջնակարգ կրթությունը պետական ուսումնական հաստատություններում անվճար է:* Այսինքն՝ թե՛ ՀՀ Սահմանադրությունը, թե՛ դրա հիման վրա ընդունված օրենքները նախատեսում են անվճար միջնակարգ կրթություն, այսինքն՝ 1-12-րդ դասարաններում կրթություն ստացող երեխաների համար

կրթությունն անվճար է: Միաժամանակ, դասագրքերն անվճար տրամադրվում են միայն 1-4-րդ դասարաններում ուսուցանող աշակերտներին:

Համեմատություն անցկացնելու նպատակով ուսումնասիրվել են ՀՀ կրթության և գիտության նախարարների՝ հանրակրթական ծրագրեր իրականացնող հաստատությունների դասագրքերի համար ներդրումային գումարների չափը հաստատելու մասին 2010-2017 թվականների համանուն հրամանները: Հանրակրթական ծրագրեր իրականացնող հաստատությունների յուրաքանչյուր ուսումնական տարվա դասագրքերի համար ներդրումային գումարների չափը հաստատելու մասին ՀՀ կրթության և գիտության նախարարի տարբեր տարիների հրամանների ուսումնասիրությունը ցույց է տալիս, որ դասագրքերի համար նշված ներդրումային գումարների չափը տարեցտարի ոչ միայն չի պակասում, այլև՝ ավելանում է:

Ուսումնական հաստատությունների կրթական ծրագրերով հաստատված դասագրքերի ներդրումային գումարների տարեցտարի աճման միտումը կարելի է ցույց տալ, օրինակ՝ ուսումնական հաստատությունների 5-րդ դասարանի դասագրքերի օրինակով: Այսպես, *մայրենիի դասագիրք*՝ 330 ՀՀ դրամ 2010 թվական, 470 ՀՀ դրամ 2014 թվական, 490 ՀՀ դրամ 2017 թվական, *մաթեմատիկայի դասագիրք*՝ 330 ՀՀ դրամ 2010 թվական, 470 ՀՀ դրամ 2014, 490 ՀՀ դրամ 2017 թվական, *ռուսաց լեզվի դասագիրք*՝ 450 ՀՀ դրամ 2010 թվական, 420 ՀՀ դրամ 2014 թվական, 420 ՀՀ դրամ 2017 թվական, *անգլերենի դասագիրք*՝ ՀՀ 400 դրամ 2010 թվական, 440 ՀՀ դրամ 2014, 490 ՀՀ դրամ 2017 թվական, *տեխնոլոգիայի դասագիրք*՝ 400 ՀՀ դրամ 2010 թվական, 280 ՀՀ դրամ 2014 թվական, 280 ՀՀ դրամ 2017 թվական, *հայրենագիտության դասագիրք*՝ 330 ՀՀ դրամ 2010 թվական, 380 ՀՀ դրամ 2014 թվական, 380 ՀՀ դրամ 2017 թվական, *բնագիտության դասագիրք*՝ 330 ՀՀ դրամ 2010 թվական, 380 ՀՀ դրամ 2014 թվական, 380 ՀՀ դրամ 2017 թվական, *երաժշտության դասագիրք*՝ 330 ՀՀ դրամ 2010 թվական, 470 ՀՀ դրամ 2014 թվական, 470 ՀՀ դրամ 2017 թվական, *Հայոց*

*ելեղեցու պատմության դասագիրք՝ 250 ՀՀ դրամ 2010 թվական, 300 ՀՀ դրամ 2014 թվական, 300 ՀՀ դրամ 2017 թվական:*<sup>3</sup>

Ուսումնասիրությունները ցույց են տալիս, որ ուսումնական հաստատությունների դասագրքերի ներդրումային գումարների չափը ավելանում է ոչ միայն տևական ժամանակի ընթացքում (օրինակ՝ 2010 և 2017 թվականների ընթացքում), այլև՝ յուրաքանչյուր տարի: Այսպես, «Հանրակրթական ծրագրեր իրականացնող հաստատությունների 2016-2017 ուսումնական տարվա դասագրքերի համար ներդրումային գումարների չափը հաստատելու մասին» ՀՀ կրթության և գիտության նախարարի թիվ 739-Ա/2 և «Հանրակրթական ծրագրեր իրականացնող հաստատությունների 2017-2018 ուսումնական տարվա դասագրքերի համար ներդրումային գումարների չափը հաստատելու մասին» ՀՀ կրթության և գիտության նախարարի թիվ 834-Ա/2 հրամանների հավելվածներում հաստատված 2016-2017 և 2017-2018 ուսումնական տարվա դասագրքերի համար ներդրումային գումարների չափերի համադրված ուսումնասիրության արդյունքները ցույց են տալիս, որ 2016-2017 թվականի համեմատությամբ 2017-2018 թվականին հանրակրթական ծրագրեր իրականացնող հաստատությունների ընդհանուր կրթական ծրագրերով նախատեսված 10 առարկաների դասագրքերի ներդրումային գումարների չափն ավելացել է: Օրինակ՝ *ռուսաց լեզվի դասագիրք՝ 2016 թվականին՝ 470 ՀՀ դրամ, 2017 թվականին՝ 490 ՀՀ դրամ, անգլերենի, գերմաներենի, ֆրանսերենի դասագրքեր՝ 2016 թվականին՝ 360 ՀՀ դրամ, 2017 թվականին՝ 550 ՀՀ դրամ, համաշխարհային պատմության դասագիրք՝ 2016 թվականին՝ 410 ՀՀ դրամ, 2017 թվականին՝ 550 ՀՀ դրամ:* Ներդրումային գումարների

---

<sup>3</sup> «2010-2011 ուսումնական տարվա հանրակրթական ծրագրեր իրականացնող հաստատությունների դասագրքերի համար ներդրումային գումարների չափը հաստատելու մասին» ՀՀ կրթության և գիտության նախարարի թիվ 1322-Ա/2;

«Հանրակրթական ծրագրեր իրականացնող հաստատությունների 2014-2015 ուսումնական տարվա դասագրքերի համար ներդրումային գումարների չափը հաստատելու մասին» ՀՀ կրթության և գիտության նախարարի թիվ 804-Ա/2;

«Հանրակրթական ծրագրեր իրականացնող հաստատությունների 2014-2015 ուսումնական տարվա դասագրքերի համար ներդրումային գումարների չափը հաստատելու մասին» ՀՀ կրթության և գիտության նախարարի թիվ 834-Ա/2

չափերի իջեցումներ են նկատվել միայն 2 առարկաների դասագրքերի համար (ֆիզիկայի և կենսաբանության դասագրքեր):

Պետական ուսումնական հաստատություններում ընդհանուր կրթության ծրագրերով նախատեսված դասագրքերի համար ներդրումային գումարներ (ուստի և միջնակարգ կրթության համար «թաքնված վճարներ») սահմանելու արդյունքում փաստորեն հարցի տակ է դրվում կրթության անվճար լինելը, իսկ որոշ դեպքերում անձինք ուղղակիորեն կարող են զրկվել կրթության իրավունքի լիարժեք իրականացման հնարավորությունից (օրինակ՝ սոցիալապես անապահով լինելու և միաժամանակ մի քանի դպրոցական երեխա ունենալու դեպքում):

Ընդ որում, օրենքի մակարդակով այդ վճարների վերաբերյալ խոցելի խմբերի երեխաների դասագրքերի համար որևէ բացառություն նախատեսված չէ: Այսպես, նախքան ««Կրթության մասին» ՀՀ օրենքում փոփոխություններ կատարելու մասին» ՀՀ 2015 թվականի հունվարի 3-ի N° ՀՕ-201-Ն օրենքի ընդունումը՝ «Կրթության մասին» ՀՀ օրենքը սահմանում էր, որ պետական հանրակրթական դպրոցների առաջին դասարանների աշակերտներին պետությունը, պետական բյուջեի միջոցների հաշվին, անվճար ապահովում է դասագրքերով, իսկ սոցիալապես անապահով ընտանիքների երեխաներին՝ տարրական ընդհանուր կրթական ծրագրերով նախատեսված դասագրքերով: Սակայն խոցելի խմբերի երեխաներին կրթական ծրագրերով նախատեսված դասագրքերով ապահովման երաշխիք սահմանող այս դրույթը օրենքի հետագա փոփոխությունների արդյունքում (2015 թվականի հունվարի 3-ի N° ՀՕ-201-Ն օրենքով) վերացվել է:

Ավելին, ՀՀ կառավարության 2006 թվականի օգոստոսի 24-ի «Հայաստանի Հանրապետության պետական հանրակրթական ուսումնական հաստատությունների ծախսերի հաշվարկման, պետական հանրակրթական ուսումնական հաստատությունների ծախսերում կատարվող վերաբաշխումների կարգը հաստատելու և Հայաստանի Հանրապետության կառավարության 2001 թվականի օգոստոսի 25-ի N 773 որոշումն ուժը կորցրած ճանաչելու մասին» N 1262-Ն որոշմամբ հաստատվել է ՀՀ բոլոր

պետական հանրակրթական ուսումնական հաստատությունների, ըստ աշակերտների թվի, ֆինանսավորման իրականացման բանաձևը: Այս բանաձևում ներառված է նաև սոցիալապես անապահով ընտանիքների երեխաների դասագրքերի վարձավճարի համար փոխհատուցվող գումարի չափը (ՍԱդգ): ՀՀ կրթության և գիտության նախարարության տրամադրած տեղեկությունների համաձայն՝ սոցիալապես անապահով ընտանիքների սովորողներին հատկացվող դասագրքերի համար ներդրումային գումարների փոխհատուցումն իրականացվում է Հայաստանի Հանրապետության պետական բյուջեի «Սոցիալապես անապահով ընտանիքների երեխաների դասագրքերի վարձավճարների փոխհատուցում» ծրագրի շրջանակներում<sup>4</sup>: Հանրակրթական ուսումնական հաստատության սոցիալապես անապահով ընտանիքների սովորողների ցուցակը քննարկվում և ձևավորվում է հաստատության մանկավարժական և ծնողական խորհուրդների համատեղ նիստում, որը հաստատվում է տնօրենի կողմից:

Սակայն խնդիրն այն է, որ պարզ չէ, թե ի՞նչ չափանիշների հաշվառմամբ, ի՞նչ սկզբունքով են ընտրվում ցուցակում ներգրավված երեխաները կամ նրանց ընտանիքը, արդյոք հիմք է ընդունվում ընտանիքի նպաստառու լինելու փաստը, թե՞ ցուցակը կազմվում է նաև այլ չափանիշների հիման վրա: Անհատակության հանգեցնող բոլոր այս հարցերը գործնականում մի շարք խնդիրներ են առաջացնում: Նախևառաջ ամոթի և իրենց երեխաներին հնարավոր խարանից զերծ պահելու պատճառով որոշ ծնողներ առհասարակ չեն բարձրաձայնում իրենց կողմից այդ վճարների տրամադրման բարդությունները, իսկ մի շարք դեպքերում էլ այս իրավիճակը բերում է խտրական վերաբերմունքի: Մարդու իրավունքների պաշտպանի աշխատակազմ ներկայացված ահազանգերով ծնողները նշել են, որ դասագրքերի ներդրումային գումարներն ուշացնելու արդյունքում վատթարացել է իրենց երեխայի նկատմամբ վերաբերմունքը

---

<sup>4</sup> ՀՀ կրթության և գիտության նախարարի «Սոցիալապես անապահով ընտանիքների երեխաներին հայաստանի հանրապետության պետական ուսումնական հաստատությունների կողմից անվճար տրվող դասագրքերի դիմաց փոխհատուցման ենթակա գումարների մասին» 2011 թվականի հոկտեմբերի 12-ի №1137-Ա/Ք հրաման

file:///D:/data/Downloads/4877arm-Hraman1137.pdf



դպրոցի անձնակազմի կողմից: Այս մասին են վկայում նաև ոլորտի հասարակական կազմակերպությունների և անհատների հետ առանձնագրույցները: Արդյունքում ստացվում է այնպես, որ նույն սոցիալական պայմաններում ապրող երկու տարբեր ընտանիքների դեպքում գումարի գանձումն իրականացվում է տարբեր ձևերով: Այսինքն՝ մի դեպքում ընտանիքը կհամարվի աջակցության կարիք ունեցող և հետևաբար՝ կազատվի ներդրումնային գումարի վճարումից, իսկ այլ դեպքում՝ մեկ այլ ընտանիք, որը նույն սոցիալական վիճակում է, ստիպված կլինի վճարել ներդրումնային գումարները:

Համանման խնդիրներ են բարձրաձայնվել նաև Մարդու իրավունքների պաշտպանի աշխատակազմ ահազանգած անձանց կողմից, ովքեր ներկայացրել են սոցիալապես անապահով ընտանիքների բարդությունները կապված դասագրքերի համար ներդրումնային գումարների գանձման հետ:

## **6. Օրենքի նշված դրույթները հակասահմանադրական են հետևյալ հիմնավորումներով.**

Խնդիրն անհրաժեշտ է ուսումնասիրել անվճար կրթության իրավունքի իրացման տեսանկյունից: Մասնավորապես՝ ՀՀ Սահմանադրության 15-րդ հոդվածի համաձայն՝ պետությունը խթանում է կրթության և գիտության զարգացումը: Ավելին, ՀՀ Սահմանադրության՝ անձի հիմնարար իրավունքներն ամրագրող 2-րդ գլխի 38-րդ հոդվածի 1-ին մասի համաձայն՝ պետական ուսումնական հաստատություններում միջնակարգ կրթությունն անվճար է: Միջնակարգ կրթության անվճար լինելու երաշխիքներ են ամրագրված եղել նաև 2005 թվականի խմբագրությամբ ՀՀ Սահմանադրության 39-րդ հոդվածի 3-րդ մասով: Ավելին, ՀՀ Սահմանադրության մեկնաբանությունների գիտագործական ժողովածուի համաձայն՝ այդ երաշխիքի մեկնաբանության համար կարևոր նշանակություն ունի «միջնակարգ կրթություն» հասկացության բովանդակության բացահայտումը<sup>5</sup>: Միջնակարգ կրթությունը միջնակարգ (լրիվ) ընդհանուր և հատուկ ընդհանուր կրթությունն է, որն իրականացվում

<sup>5</sup> <http://www.concourt.am/armenian/library/cclibrary/2010/sahmanadrakan2010.pdf>, էջ 466

է եռաստիճան միջնակարգ հանրակրթական դպրոցներում՝ տարրական, միջին դպրոց և ավագ դպրոց հաջորդական աստիճաններով: Այսպիսով, Սահմանադրությունը սահմանում է, որ միջնակարգ կրթությունը պետության կողմից հիմնադրված պետական ուսումնական հաստատություններում՝ տարրական, միջին և ավագ դպրոցներում անվճար է:

Այս սահմանադրական երաշխիքները հաշվի առնելով՝ օրենսդիրը համապատասխան հենակետային դրույթներ է նախատեսել նաև ոլորտը կարգավորող օրենքներում: Մասնավորապես՝ «Կրթության մասին» ՀՀ օրենքի 6-րդ հոդվածի 3-րդ մասի համաձայն՝ պետությունը ՀՀ քաղաքացիների համար երաշխավորում է պետական ուսումնական հաստատություններում անվճար ընդհանուր միջնակարգ և մրցութային կարգով՝ անվճար նախնական (արհեստագործական), միջին, բարձրագույն և հետբուհական մասնագիտական կրթություն: Ըստ «Հանրակրթության մասին» ՀՀ օրենքի 4-րդ հոդվածի 5-րդ մասի՝ միջնակարգ կրթությունը պետական ուսումնական հաստատություններում անվճար է:

Անվճար կրթության իրավունքը երաշխավորվում է նաև ՀՀ կողմից վավերացված մի շարք միջազգային փաստաթղթերով: Մասնավորապես՝ Եվրոպայի խորհրդի «Վերանայված եվրոպական սոցիալական խարտիայի»՝ երեխաների և երիտասարդների սոցիալական, իրավական և տնտեսական պաշտպանվածության իրավունքը սահմանող 17-րդ հոդվածի համաձայն՝ պետությունը պարտավորվել է, ի թիվս այլնի, նաև ապահովել երեխաների և երիտասարդների՝ տարրական և միջնակարգ դպրոցներում անվճար կրթությունը:

Սոցիալական իրավունքների եվրոպական կոմիտեի «Վերանայված եվրոպական սոցիալական խարտիայի» տարբեր հոդվածների առնչությամբ տրված մեկնաբանության նախադեպային իրավունքի ժողովածուի համաձայն՝ երեխաների և երիտասարդների՝ իրենց անձի, ֆիզիկական և մտավոր կարողությունների զարգացմանը նպաստող միջավայրում մեծանալու իրավունքի ապահովման տեսանկյունից պետությունը ուղղակիորեն կամ հասարակական ու մասնավոր կազմակերպությունների հետ

համագործակցության միջոցով ձեռնարկում է բոլոր պատշաճ միջոցներն ուղղված երեխաների և երիտասարդների անվճար միջնակարգ կրթության իրավունքի իրականացմանը: Ըստ նշված փաստաթղթի՝ կրթության տարրական և միջին աստիճանները պետք է լինեն անվճար, ինչը ներառում է կրթական հիմնական համակարգը (միջնակարգ կրթություն): Ավելին, ըստ կոմիտեի՝ «թաքնված վճարները», որոնք են՝ գրքերի կամ համազգեստների վճարները, պետք է լինեն ողջամիտ և դրանց ազդեցության նվազեցման համար խոցելի խմբերին աջակցություն պետք է ցուցաբերվի:

«Տնտեսական, սոցիալական և մշակութային իրավունքների մասին» ՄԱԿ-ի միջազգային դաշնագիրը վավերացրած պետությունները ճանաչում են կրթության՝ յուրաքանչյուր մարդու իրավունքը: Նրանք համաձայնում են, որ կրթությունը պետք է ուղղված լինի մարդկային անհատի և նրա արժանապատվության գիտակցման լիակատար զարգացմանը և պետք է ամրապնդի հարգանքը մարդու իրավունքների ու հիմնական ազատությունների նկատմամբ: Դաշնագրի 13-րդ հոդվածի համաձայն՝ դաշնագրին մասնակցող պետությունները գտնում են, որ այդ իրավունքի լրիվ իրականացման համար՝

- առաջնային (primary) կրթությունը պետք է լինի պարտադիր և անվճար բոլորի համար,
- միջին (secondary) կրթությունն իր զանազան ձևերով, ներառյալ պրոֆեսիոնալ-տեխնիկական կրթությունը, պետք է լինի բաց և մատչելի բոլորի համար՝ բոլոր անհրաժեշտ միջոցների ձեռնարկման և, մասնավորապես, *անվճար կրթություն աստիճանաբար մտցնելու ճանապարհով*:

Ավելին, ՄԱԿ-ի Տնտեսական, սոցիալական և մշակութային իրավունքների կոմիտեի Թիվ 13 ընդհանուր մեկնաբանության 6-րդ կետի համաձայն՝ տնտեսական հասանելիությունը ենթադրում է, որ կրթությունը պետք է հասանելի լինի բոլորին: Խոսելով հասանելիության մասին՝ կոմիտեն առանձնացնում է տնտեսական հասանելիությունը, որն իրենից ենթադրում է, որ պետությունները պետք է ապահովեն

անվճար սկզբնական կրթություն և ձեռնարկեն բոլոր անհրաժեշտ քայլերը միջին և բարձրագույն կրթությունն անվճար դարձնելու ուղղությամբ<sup>6</sup>:

ՄԱԿ-ի Տնտեսական, սոցիալական և մշակութային իրավունքների կոմիտեի Թիվ 11 ընդհանուր մեկնաբանության 1-ին կետի համաձայն՝ *պետության ֆինանսական դժվարությունները չեն կարող խոչընդոտ հանդիսանալ վերջինիս անվճար կրթության ապահովման պարտականության իրականացման համար*: ՄԱԿ-ի Տնտեսական, սոցիալական և մշակութային իրավունքների կոնվենցիայի վավերացման ժամանակ, եթե պետությունը ի վիճակի չէ ապահովել պարտադիր անվճար միջնակարգ կրթություն, վերջինս կրում է անմիջական պարտականություն երկու տարվա ընթացքում մշակել և ընդունել գործողությունների մանրամասն ծրագիր ողջամիտ ժամանակում վերջինիս աստիճանական ներդրման համար: Ավելին, ըստ նույն ընդհանուր մեկնաբանության 8-րդ հոդվածի՝ նշված իրավունքն ուղակիորեն ձևակերպված է այնպես, որպեսզի ապահովվի անվճար միջնակարգ կրթության իրականացումը երեխայի, ծնողների կամ խնամակալների համար: Ըստ կոմիտեի՝ կառավարության, տեղական մարմինների, դպրոցների կողմից սահմանված, ինչպես նաև այլ ուղակի վճարները խոչընդոտներ են հանդիսանում կրթության իրավունքից օգտվելու, ինչպես նաև կարող են վտանգել դրա իրականացումը: Կոմիտեն նշում է նաև, որ անուղղակի վճարները ևս, կարող են դասվել այդ նույն վճարների շարքին:

Դաշնագրի նշյալ երկու ընդհանուր մեկնաբանությունների համադրված ուսումնասիրությունից ստացվում է, որ դաշնագրում, ինչպես նաև միջազգային մի շարք փաստաթղթերում ամրագրված կրթության իրավունքի իրականացման համար պարտադիր է դրա անվճար լինելը: Ավելին, պետության պարտականությունն է, դաշնագիրը վավերացնելուց անմիջապես հետո կարճ ժամանակահատվածում ձեռնարկել անվճար կրթության իրավունքի իրացման ապահովմանն ուղղված քայլեր՝

---

<sup>6</sup> ՄԱԿ-ի Տնտեսական, սոցիալական և մշակութային իրավունքների կոմիտեի Թիվ 13 ընդհանուր մեկնաբանության (CESCR General Comment No. 13: The Right to Education (Art. 13) [http://www.right-to-education.org/sites/right-to-education.org/files/resource-attachments/CESCR\\_General\\_Comment\\_13\\_en.pdf](http://www.right-to-education.org/sites/right-to-education.org/files/resource-attachments/CESCR_General_Comment_13_en.pdf)

համաձայն կազմված գործողությունների ծրագրի, եթե վավերացման ժամանակ հնարավոր չէր այն ապահովել:

Սակայն ուսումնական հաստատությունների դասագրքերի համար նախատեսված ներդրումային գումարների հարցի ուսումնասիրությունը ցույց է տալիս, որ պետության քաղաքականությունը նշյալ խնդրում չի հետևում մեկնաբանությամբ սահմանված անվճար ուսումնառությանն ուղղված քայլերի ձեռնարկմանը և վերջնականապես ՀՀ Սահմանադրությամբ և միջազգային մի շարք փաստաթղթերով ամրագրված ամբողջական անվճար միջնակարգ կրթության իրավունքի իրականացման ապահովմանը, ինչը վկայում են անուղակի վճարների գանձումը, տարեցտարի ավելացող դասագրքերի ներդրումային գումարների աճը: Նշվածը հիմնավորվում է նախորդ բաժնում նշված ներդրումային գումարների նախատեսմամբ և դրանց աճման օրինաչափությամբ: Այնինչ միջազգային չափանիշների համապատասխան վերջիններս պետք է աստիճանաբար նվազեցվեն և որպես վերջնական նպատակ կրթության իրավունքի իրականացման խոչընդոտներ հանդիսացող անուղակի վճարները պետք է վերացվեն:

Միջազգային փորձի ուսումնասիրությունը ցույց է տալիս, որ պետությունների մեծամասնությունը կրում են անվճար միջնակարգ կրթության իրավունքի ապահովման պարտականություն, ինչն ամրագրված է սահմանադրությամբ (Չեխիա, Դանիա, Իռլանդիա և այլն): Ըստ այդմ, շատ երկրներ ամբողջ միջնակարգ ուսումնական շրջանի համար ապահովում են հենց դպրոցական նյութերի՝ դասագրքերի անվճար տրամադրումն աշակերտերին: Օրինակ՝ Լիտվայի «Կրթության մասին» օրենքի 70-րդ հոդվածի համաձայն՝ քառաստիճան կրթական համակարգն անվճար է, որի 3 աստիճաններում կրթական ծրագրերի նյութերն անվճար են: Ավելին, «Աշակերտների սոցիալական աջակցության մասին» օրենքով առանձին կարգավորվում են աշակերտներին տրամադրվող այլ օգնությունների շրջանակը և տրամադրման կարգը: Շվեդիայում 7-15 տարեկան անձանց համար կրթությունը պարտադիր է, որի

իրականացման համար կրթական նյութերն անվճար են: Լեհաստանում ևս 1-8-րդ դասարանի աշակերտների համար կրթական ծրագրերի նյութերն անվճար են:

Կրթության իրավունքին անդրադարձել է նաև Մարդու իրավունքների եվրոպական դատարանը: Այսպես, Պոնոմարյովն ընդդեմ Բուլղարիայի գործով վճռում եվրոպական դատարանը դիրքորոշում է հայտնել այն մասին, որ պետությունները կարող են ունենալ լեգիտիմ պատճառներ միջոցների կարիք ունեցող հանրային ծառայությունների (այդ թվում կրթության ոլորտում) օգտագործումը սահմանափակելու համար: Դատարանի՝ նշյալ գործի շրջանակներում հայտնաձև դիրքորոշման համաձայն՝ պետությունների հայեցողության սահմանները կրթության աստիճանի բարձրացմանը զուգընթաց մեծանում է: Կրթության միջին աստիճանը անձի զարգացման և սոցիալական ու մասնագիտական ներգրավվածության համար կարևոր նշանակություն ունի: Վերջինիս ուղղված ցանկացած սահմանափակում հատկապես չպետք է ստեղծի Մարդու իրավունքների եվրոպական կոնվենցիայի 14-րդ հոդվածը խախտող խտրական համակարգ<sup>7</sup>:

Ստացվում է, որ ՀՀ-ն ճանաչում և երաշխավորում է անվճար միջնակարգ կրթության իրավունքը: Միաժամանակ, այդ իրավունքի իրացման համար անհրաժեշտ և դրա բաղկացուցիչ մասը կազմող դասագրքերի համար նախատեսվել է վճար, որը գանձվում է իրավունքի սուբյեկտից: Ավելին, իրավակարգավորումների համադրված վերլուծությունը ցույց է տալիս, որ դասագրքերի տրամադրման համար պարտադիր պայման է այդ գումարների վճարումը: Ուստի, նախատեսելով անվճար միջնակարգ կրթություն՝ պետությունը նախատեսել է «թաքնված վճար», որը կարող է սահմանափակել անձի՝ անվճար միջնակարգ կրթություն ստանալու իրավունքը: Ընդ որում, նախատեսված չէ որևէ տարանջատում կապված, օրինակ, խոցելի խմբերի երեխաների դասագրքերի վերաբերյալ:

---

<sup>7</sup> Տե՛ս Պոնոմարյովն ընդդեմ Բուլղարիայի (Ponomaryovi v. Bulgaria) գործով վճիռը, 28-ը նոյեմբեր 2011 թվական, գանգատ թիվ 5335/05, կետ 54

Այսպես, ՀՀ Սահմանադրությամբ և այլ ներպետական իրավական ակտերով սահմանվել է անվճար միջնակարգ կրթության իրավունքը, սակայն իրավակիրառ պրակտիկայում նշված դրույթներին տրված մեկնաբանությունը, մասնավորապես՝ Հրամանի սահմանումը և դրա արդյունքում հանրակրթական ծրագրեր իրականացնող հաստատությունների դասագրքերի համար ամենամյա ներդրումային գումարների չափը հաստատելու մասին համապատասխան հրամանների սահմանումը խնդրահարույց է կրթության իրավունքի, հատկապես անվճար միջնակարգ կրթության իրավունքի իրականացման համար:

Պետք է նշել, որ ՀՀ Սահմանադրության 75-րդ հոդվածի համաձայն՝ հիմնական իրավունքները և ազատությունները կարգավորելիս օրենքները սահմանում են այդ իրավունքների և ազատությունների արդյունավետ իրականացման համար անհրաժեշտ կազմակերպական կառուցակարգեր և ընթացակարգեր: Այսինքն՝ ՀՀ Սահմանադրությամբ ամրագրվում է, որ բավարար չէ ուղղակի ամրագրել հիմնական իրավունքները, քանի որ դրանց արդյունավետ իրականացման համար անհրաժեշտ են համապատասխան կառուցակարգեր և հստակ ընթացակարգեր:

ՀՀ Սահմանադրական դատարանը 2011 թվականի հուլիսի 15-ի թիվ ՍԴՌ-984 որոշմամբ արձանագրել է, որ «Սահմանադրական դատարանի մասին» ՀՀ օրենքի 63-րդ հոդվածի 1-ին մասի պահանջներին համապատասխան՝ վիճարկվող իրավակարգավորումների սահմանադրականությունը որոշելիս կարևոր նշանակություն ունի վիճարկվող դրույթների սահմանադրաիրավական բովանդակության բացահայտումը՝ իրավակիրառական պրակտիկայում դրանց տրված մեկնաբանությամբ, քանի որ իրավանորմի սահմանադրականությունը պայմանավորված է ոչ միայն նրանով, թե ինչպես է այն շարադրված իրավական ակտում, այլև նրանով, թե ինչպես է այն ընկալվում ու կիրառվում իրավակիրառ պրակտիկայում:

Ուստի, կարևոր է ոչ միայն անվճար միջնակարգ կրթության իրավունքի ամրագրումը, այլ դրա լիարժեք իրականացման գործուն կառուցակարգերի առկայությունը:

Ելնելով վերոգրյալից և ղեկավարվելով ՀՀ Սահմանադրության 101-րդ հոդվածի 1-ին մասի 8-րդ կետով, «Սահմանադրական դատարանի մասին» ՀՀ օրենքի 68-րդ հոդվածի 1-ին մասով, «Մարդու իրավունքների պաշտպանի մասին» ՀՀ սահմանադրական օրենքի 29-րդ հոդվածի 4-րդ մասով՝

## **ԽՆԴՐՈՒՄ ԵՄ**

1. Սույն դիմումն ընդունել վարույթ,

2. Որորչեղ «Կրթության մասին» ՀՀ օրենքի 6-րդ հոդվածի 4-րդ մասի ՀՀ Սահմանադրության 38-րդ հոդվածին համապատասխանության հարցը այնքանով, որքանով այն չի ապահովում պետական ուսումնական հաստատություններում միջնակարգ անվճար կրթություն ստանալու իրավունքի լիարժեք իրացումը: Օրենսդրական բացի և իրավակիրառ պրակտիկայում վիճարկվող դրույթին տրված մեկնաբանության, գործնականում այդ դրույթների ընկալման և կիրառման արդյունքում առաջանում են խնդիրներ, ինչը հանգեցնում է կրթության սահմանադրական իրավունքի սահմանափակման:

**ԱՐՄԱՆ ԹԱԹՈՅԱՆ**